

ԵՊՀ-Ն ԱՆՄԱՍՆ ԶԻ ՄՆԱԼՈՒ ՀԱՅՈՑ ՑԵՂԱՍՊԱՆՈՒԹՅԱՆ 100-ՐԴ ՏԱՐԵԼԻՑԻՆ ՆՎԻՐՎԱԾ ՄԻՋԱՑԱՌՈՒՄՆԵՐԻՑ



Համալսարանականները ներկայացրին Հայոց ցեղասպանության 100-րդ տարելիցի շրջանակներում ԵՊՀ-ի կողմից իրականացվող միջոցառումները:

Այսօր ԵՊՀ հայագիտական հետազոտությունների ինստիտուտի (ՀՀԻ) քննարկումների սրահում տեղի ունեցած մամուլի ասուլիսը վարեցին Հայոց ցեղասպանության 100-ամյա տարելիցին նվիրված ԵՊՀ միջոցառումների նախապատրաստական աշխատանքները համակարգող հանձնաժողովի նախագահի տեղակալ, ԵՊՀ ՀՀԻ փոխտնօրեն Միեր Հովհաննիսյանն ու ԵՊՀ հասարակայնության հետ կապերի և լրատվության վարչության պետ Կարեն Գրիգորյանը:

«Հայտնի է, որ համալսարանականները միշտ էլ ակտիվ մասնակցել են Հայոց ցեղասպանությանն առնչվող միջոցառումներին, ինչպես նաև հանդես են եկել նախաձեռնողների դերում, ուստի Հայոց մեծ եղբուն 100-րդ տարելիցին նվիրված միջոցառումների շրջանակներում Մայր բուհը չէր կարող անմասն մնալ», - նշեց Կարեն Գրիգորյանը և հավելեց, որ 1960-ական թվականներին հենց համալսարանականների ջանքերով և վերջիններիս մասնակցությամբ տեղի ունեցած Հայոց ցեղասպանությանը նվիրված աննախադեպ ակցիաներ ու մի շարք միջոցառումներ:

Այնուհետև ԵՊՀ ՀՀԻ փոխտնօրեն Միեր Հովհաննիսյանը բավականին մանրամասն անդրադարձավ ՀՀԻ «Ցեղասպանագիտություն» մագիստրոսական ծրագրին, Հայոց ցեղասպանության 100-ամյակի շրջանակում ԵՊՀ-Սփյուռք գործակցությանը, հրատարակած գրքերին ու աշխատություններին, ինչպես նաև ներկայացրեց genocide100.ysu.am և www.armeniansgenocide.am համացանցային նախագծերը:

Մասնավորապես Մայր բուհը սույն տարվա ընթացքում կազմակերպելու է շուրջ վեց տասնյակ միջոցառումներ, այդ թվում՝ գիտաժողովներ, հանդիպումներ, քննարկումներ, դասախոսություններ, հուշ-ցերեկույթներ, ցուցադրություններ, այցելություններ և այլն:

Հիմնական միջոցառումը կանցկացվի ապրիլի 21-ին, երբ հանդիսավոր արարողությամբ կբացվի ԵՊՀ երախտիքի ծառուղին: Սույն օրը ԵՊՀ գրադարանում տեղի կունենա նաև ցեղասպանության թեմային նվիրված սրահի բացում, որին կհաջորդի ԵՊՀ գիտխորհրդի ընդլայնված նիստը:

Անդրադառնալով գիտական հետազոտություններին և հրատարակություններին ՀՀԻ փոխտնօրենը շեշտեց, որ անդրադարձ է լինելու նաև Մեծ եղբուն ականատեսների, տարբեր միջազգային հարթակներում հանդես եկած գործիչների աշխատանքների՝ Հայաստանում վերահրատարակման գործընթացին:

«Ամեն կերպ փորձելու ենք տվյալ գրքերը հասանելի դարձնել և՛ ներքին, և՛ Սփյուռքի լսարանների համար: Հետազոտություններն իրականացնելիս հատուկ ուշադրություն ենք դարձրել այն գործերին, որոնք օտարալեզու են: Մասնավորապես այս պահին պատրաստում ենք և գրեթե ավարտին է հասցված Հայոց ցեղասպանության պատմաաշխարհագրական քարտեզը, որտեղ բացատրագրությունները նույնպես անգլերեն լեզվով են լինելու: Հրատարակման է պատրաստվում նաև Օսմաներենի դասագիրքը, որը նույնպես լուրջ ձեռքբերում է», - նշեց Միեր Հովհաննիսյանը:

Բանախոսները տեսապատկերների միջոցով ներկայացրին համացանցային նախագծերը և ընդգծեցին, որ յուրաքանչյուր ոք կարող է «ԵՊՀ-ն հիշում է և պահանջում» խորագիրը կրող genocide100.ysu.am վեբկայքի միջոցով տեղեկանալ իրականացվող միջոցառումներին և մասնակցել դրանց:

Հիշեցնենք, որ միջոցառումների կազմակերպման և համակարգման նպատակով բուհում ստեղծվել է հանձնաժողով, որը ղեկավարում է ԵՊՀ ռեկտոր Արամ Սիմոնյանը: Համալսարանական հանձնաժողովում ընդգրկված են ոչ միայն պրոֆեսորադասախոսական կազմի ներկայացուցիչներ, այլև վարչական աշխատողներ և ուսանողներ: